



## Rombakan Kabinet: Kepimpinan baharu rancakkan usaha beri perkhidmatan terbaik - Ahmad Zahid

Disember 12, 2023 @ 7:12pm

KUALA LUMPUR: Kehadiran barisan kepimpinan baharu dalam Kabinet Kerajaan Perpaduan akan merancakkan lagi usaha memberi perkhidmatan terbaik kepada rakyat dan negara selaras dengan gagasan Malaysia MADANI, kata Datuk Seri Dr Ahmad Zahid Hamidi.

Timbalan Perdana Menteri itu turut optimis anggota Kabinet terbabit akan bekerja secara berpasukan dalam menerajui kementerian masing-masing bagi memperkasakan ekonomi dan meningkatkan kemakmuran serta kesejahteraan seluruh rakyat Malaysia.

"Saya ingin mengucapkan tahniah dan syabas kepada semua kepimpinan baharu yang dilantik serta selesai mengangkat sumpah jawatan ahli Kabinet dan menyimpan rahsia di hadapan Yang di-Pertuan Agong, hari ini.

"Saya yakin kepimpinan baharu ini dapat memberikan perkhidmatan yang terbaik, beramanah dan berdedikasi sepanjang perkhidmatan mereka nanti," katanya dalam hantaran Facebook, petang ini.

Terdahulu, Datuk Seri Anwar Ibrahim mengumumkan pelantikan masing-masing lima menteri serta timbalan menteri, termasuk empat muka baharu dan penampilan semula lima bekas menteri dalam rombakan Kabinet Kerajaan Perpaduan.

Perdana Menteri turut mengumumkan penyusunan semula kementerian berdasarkan keperluan semasa membabitkan Kementerian Sumber Asli, Alam Sekitar dan Perubahan Iklim yang kini dipecahkan kepada Kementerian Peralihan Tenaga dan Daya Guna Awam serta Kementerian Sumber Asli dan Kelestarian Alam.

Kementerian Komunikasi dan Digital pula dipecahkan kepada Kementerian Digital serta Kementerian Komunikasi.

Rombakan berkenaan menyaksikan jumlah ahli Jemaah Menteri meningkat daripada 28 kepada 31 orang, manakala timbalan menteri pula meningkat daripada 27 kepada 29 orang, dengan jumlah keseluruhan anggota pentadbiran Kerajaan Perpaduan kini mencecah 60 orang.

Menteri baharu yang dilantik ialah Ahli Parlimen Titiwangsa, Datuk Seri Johari Abdul Ghani, sebagai Menteri Perladangan dan Komoditi; Ahli Parlimen Damansara dan Timbalan Pengurus DAP, Gobind Singh Deo (Menteri Digital); serta Ahli Parlimen Kuala Selangor, Datuk Seri Dr Dzulkefly Ahmad (Menteri Kesihatan).

Ahli Parlimen Bukit Mertajam, Steven Sim Chee Keong yang sebelum ini Timbalan Menteri Kewangan kini memegang jawatan Menteri Sumber Manusia, manakala Datuk Seri Amir Hamzah Azizan pula Menteri Kewangan II yang dilantik sebagai senator.

Selain itu, berlaku pertukaran portfolio beberapa menteri dan timbalan menteri sedia ada, termasuk Timbalan Perdana Menteri, Datuk Seri Fadillah Yusof.

Fadillah yang sebelum ini menerajui Kementerian Perladangan dan Komoditi, kini beralih ke Kementerian Peralihan Tenaga dan Daya Guna Awam, selain turut bertanggungjawab terhadap hal ehwal Sabah dan Sarawak.

Datuk Armizan Mohd Ali yang sebelum ini Menteri di Jabatan Perdana Menteri (Hal Ehwal Sabah, Sarawak dan Tugas-Tugas Khas), kini adalah Menteri Perdagangan Dalam Negeri dan Kos Sara Hidup, mengisi kekosongan jawatan itu selepas Datuk Seri Salahuddin Ayub meninggal dunia pada 23 Julai lalu.

Datuk Seri Mohamad Hasan yang sebelum ini Menteri Pertahanan pula kini adalah Menteri Luar; Datuk Seri Mohamed Khaled Nordin (sebelum ini Menteri Pendidikan Tinggi, kini Menteri Pertahanan); Datuk Seri Dr Zamby Abdul Kadir (sebelum ini Menteri Luar, kini Menteri Pendidikan Tinggi); manakala Nik Nazmi Nik Ahmad (sebelum ini Menteri Sumber Asli, Alam Sekitar dan Perubahan Iklim, kini Menteri Sumber Asli dan Kelestarian Alam).

Kesemua menteri dan timbalan menteri baharu selesai mengangkat sumpah jawatan di hadapan Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah, di Istana Negara, di sini, hari ini. – BERNAMA